

I Langa lePhasi



I lokuFundela Phezulu neNal'ibali

Iindatjana zinamandla! *Umzuzu wokugcina*, itlolwe mtloli omthumbi kanongorwana uZukiswa Wanner, yase ifakwa iinthombe mgwali wabonompopana owazekako weSewula Afrika uRico. Ifundele abantwana abasepilweni yakho ngaleli Langa lePhasi lokuFundela Phezulu, mhlana ilanga li-1 kuMhlolanja 2018.



Imisebenzi emi-5 yeLanga lePhasi lokuFundela Phezulu

1. Fundela abantwana bakho nabanye indatjana ethi, *Umzuzu wokugcina*, ekhasini lesi-2 nelesi-3. Zijayeze ukuyifundela phezulu kambalwa ngaphambi kobana uyifundele abantwana begodu ukhumbule ukukhuluma ngelizwi elinokuphakama nokwehla lokha nawufundako.
2. Ngaphambi kokufunda indatjana, buza abantwana bonyana bakhe bayidlala ibholo erarhwako ngaphambilini, bakhe bayokubukela umdlalo webholo erarhwako bunqopho namkha bakhe bayibukela e-TV. Bakhuthaze babelane nawe ngelemuko labo lebhola erarhwako.
3. Ngemuva kokufunda indatjana, khuthaza abantwana bakho bona bayihlathulule ngokudweba namkha ukupenda isithombe sengcenywe abayithandako yendatjana.
4. Hlela umHlangano weeNdatjana zesiKhathi seKuseni ngeLanga lePhasi lokuFundela Phezulu namkha ngepelaveke. Mema abantwana beze nababelethi babo. Batjengise zoke iincwadi ozaziko bona zineendaba ezimnandi ongazikufundela phezulu ngokubafundela zona.
5. Yenza amaphosta wakho weLanga lePhasi lokuFundela Phezulu ngomnyaka ka-2018 ukuyelelisa ngokuqakatheka kwelanga leli. Ninabantwana, sikani amagama neenthombe kumagazini nemaphephandabeni, nidwebe iinthombe, nitole amagama nemitjho yenu, nisebenzise iinthombe ezikuwebhusayidi yeNal'ibali (iya ku"Story supplies" ku-www.nalibali.org). Yenzani iinqubulo zenu, namkha nisebenzise zethu – Yabelana ngendatjana namhlanjesi!



Iinzuzo ezibu-8 zokufundela phezulu

Ukufundela abantwana bakho phezulu ku-/kw-:

- batjengisa kobana uzithathela phezulu iincwadi nokufunda.
- kunikela izinto ongakhuluma ngazo nabantwana.
- akha ukuzwana phakathi kwenu.
- benza babe nelemuko lokufunda njengomsebenzi owanelisako.
- bakhuthaza kobana bafunde ukuzifundela ngokwabo begodu bahlale bafunda.
- batjengisa kobana sifunda bunjani nokobana iincwadi zisetjenziswa bunjani.
- banikela ithuba lokobana bathabele iindatjana ezisezingeni elingaphezukwekghono labo lokufunda.
- thuthukisa ilwazimagama nekghono lelimi.



Ungazibandakanya bunjani

Vakatjhela ku-www.nalibali.org nanyana ku-www.nalibali.mobi ukufaka umndenakho, iinqhema zokufundelana nanyana isikolo bese uyasiza ukwenza iLanga lePhasi lokuFundela Phezulu leli libe mgidi omkhulu eSewula Afrika!

Umzuzu wokugcina

Umtloli nguZukiswa Wanner

Iinthombe nguRico

Itjhugululwe nguNomsa Mtsweni

"Ngizokufaka amagondelo amabili namhlanjesi, Baba," kutjho uNeo lokha nakafaka amabhudzi wakhe webholo erarhwako.

"Ngizakusiza ngokungezelela ngamagondelo amathathu, Malume," kutjho uPriya osandukufika ekha bokaNeo nomfowabo omncani, uRahul.

URahul bekaphethe ivuvuzela yakhe ekhanyako ebovu.


Uyise kaNeo wahleka. "Arha-ke, ngilindele ukukwakwazela kahlanu-ke nakunjalo!"

"Nami ngingakwakwazela Malume?" kubuza uRahul.

"Iye, msanami," kutjho uyise kaNeo lokha nakasiza uMbali ukwembatha amanyathelwakhe. "Asikhambeni-ke kwanjesi!"

Boke bangena ngekoloyini. UNeo wahlala ngaphambili. Khewahlala kanengi lapha, ngaphambilini. Bekanesiqiniseko sokobana uyise nange angamvumela, lokha iinyawo zakhe nasele zizide ngokwaneleko, uzakukghona ukutjhayela ikoloyi. Kubonakala kulula. URahul noPriya bahlala ngemva baphahle uMbali. Bamkitakita naye wagigitheka.

Bathe bangakatjheji boke, kwabesele bafikile etatawini lebhola erarhwako. Bafika ngesikhathi esifaneleko sokobana uPriya noNeo bahlangane nesiqhema sabo seMaqhawe Football Club bonyana bazifuthumeze. Bebazokubambana nesiqhema seDiamond Football Club namhlanjesi.



"Nikhumbule ukuqinisekisa bonyana nidarhise iDiamonds Football Club leyo, bekuthi ngemva komdlalo bafune ukutjhugulula igama labo bathi bayiCoal Football Club," kutjho umbanduli wabo.

Kusenjalo kwabasikhathi sabadlali bonyana bagijimele ngetatawini. Usofengwana wabetha ifengwanakhe, umdlalo wase uyathoma.

Kwathoma kabuthaka, kodwana msinyana bangena emtjhovweni. Bekunetjhada elikhulu lokha imindeni yabantwana beenqhema ezimbili lezi nabakwakwazelako. Ibhola izakuba kwelinye ihlangothi isikhatjhana, kusesenjalo kubonakale ingathi iya kwelinye ihlangothi, omunye wabadlali uzakuthatha ibhola akhambe nayo! Umdlalo wakhamba ngelendlela bekwaphela isiquntu sokuthoma.



"Nginesizungu! Nithembise bonyana nizokufaka amagondelo," uRahul utjho kuNeo noPriya lokha nabaphumela ngeqadi kwetatawu.

"Kunjalo. UMbali ufuna amagondelo, uMbali ufuna amagondelo," kubuyelela uMbali. "UMbali uyayenda," wangezelela ngokuzamula. UNeo banoPriya bamane bahleka nje base bayagijima babuyela emva esiqhemeni sabo.



Yabelana ngendatjana namhlanjesi!


Ifengwana yalila abadlali bagijimela etatawini ngokwesiquntu sesibili. Umdlalo waragela phambili ngendlela egade ukhamba ngayo esiquntwini sokuthoma ... bekwasala umzuzu owodwa!

UNeo bekabambe ibholo. Waqala ngapha nangapha ukubona bonyana ingabe ukhona omunye weDiamond Football Club eduze kwakhe na. Awa, bekayedwa. Wagijimela phambili, atjhewa ibholo. Msinyazana umdlali weDiamond Football Club wavela. UNeo wamqala emehlweni

lokha nekararha ibholo idlula phakathi kwemilenze yabanye abadlali. Ababukeli barhuwelela ngethabo.

Omunye wabadlali beDiamond Football Club wanqopha ngakuNeo ukuyomemuka ibholo. Ngokurhaba, uNeo wadlulisela ibholo kuPriya.

Omunye nomunye bekaminyile lokha uPriya nakathatha ibholo ayirarha ngamandla. LADUMA! Usomapali akhenge abe ayibone ibholo nayizako! UPriya bekafake igondelo.



Kungakadluli nomzuzwana. Lokha nakatjhugulukako athi ugidinga igondelo, usofengwana wabetha ifengwana yokugcina! IMaqhawe ithumbile!

UNeo bekathabe khulu bewagijimela kuPriya wamgugela phezulu!



Bobabili bagijimela esiqhemeni sabo nombanduli kangaphandle kwetatawu, base bayadebha boke. Ngemva kwalokho uPriya noNeo bagijimela kuyisekaNeo. URahul yena bekavuthelela ivuvuzela phezulu.

"Loyo bekumsebenzi ofanelwe yi-ayisikhrimu, Priya ninoNeo," kutjho uyisekaNeo. "linkutani zethu ezimbili zingakuthabela lokho?"

"Iye! Siyayithanda i-ayisikhrimu," kutjho uMbali abaphendulela. Bahleka boke.

UNeo waguga uMbali lokha nabayokuthenga i-ayisikhrimu. Namtjhana angakawafaki amagondelo amabili agade awafuna, kodwana usize umnganakhe omkhulu bona afake igondelo! UPriya yena bekathabile ngombana bekungekokuthoma afakela iMaqhawe igondelo. Itjhada levuvuzela kaRahul belingathi udlala umvumo omnandi.





Yenza ibheji!

1. Sika phezu komuda wamachatjhazi abovu ukhuphe ibheji.
2. Faka isithombe umbala.
3. Sika indulungu elingana nebheji ekhadibhodini elimatsikana, isibonelo, ibhokisi lesirili.
4. Sebenzisa idlhu ukunamathisela ibheji phezu kwekhadibhodi.
5. Sebenzisa itheyiphu enamathelako nanyana itheyiphu yemaski ukunamathisela isiqobotjhelo ngemva kwebheji. Nanyana yenza imbobo phezu bese uthungelela ivolo nanyana ufake umtiya embotjeni uzokwazi ukuyihaga entanyeni yakho.
6. Thabela ukufaka ibheji yakho lokha nawufundako bese ulalele neenolwana ngeLanga lePhasi lokuFundela Phezulu.

Sibawa usithumele iinthombe zabantwana bakho bambethe iimbheji zeLanga lePhasi lokuFundela Phezulu. Zi-imeyilele ku-info@nalibali.org nanyana yabelana ngazo ekhasini leFacebook!

Mayelana neNal'ibali

iNal'ibali (okuligama lesiXhosa elithi "nasi indaba") lijima lesitjhaba lokuzithabisa ngokufunda. Linqophe ukuhlahlambisa nokufaka isiko lokufunda eSewula Afrika yokana, ukuze ukufunda, ukutlola nokwabelana ngeendatjana – kiwo woke amalimi weSewula Afrika – kube yingcnyene yepilo yangamalanga.



Abantwana abazombelezwe mitlolo begodu abacwile phakathi kweendatjana ezimnandi zamalimi abawezwisako, baba nelulukelo, ukuzithemba nokukhuthalela ukufunda.

Bangaba bafundi beencwadi, bese basebenza kuhle esikolweni kizo zoke iimfundo. Iindatjana zithuthukisa ilemukomagama, kuqinise umkhumbulo, kuthuthukise nengcondo zabantwana.

Kusukela ngo-2012, iNal'ibali isebenze nemibuso, imiphakathi nababambisana abahlukileko ukuqinisekisa bona woke umntwana weSewula Afrika uthola ithuba lokuba nethando leencwadi neendatjana. Abatlami beNal'ibali bafaka hlangana: iDG Murray Trust, iPRAESA (Project for the Study of Alternative Education in South Africa) neTiso Blackstar (ngaphambilini, yiTimes Media). Ngokukhuthazako, ukubandula neentlabagelo zokufunda zezinga eliphezulu, iNal'ibali isiza ukuthuthukisa isitjhaba sabafundi.

iNal'ibali ilapha ukukhuthaza nokusekela wena. **Thintana nathi** ngokudosela iziko lethu umtato ku-02 11 80 40 80, nanyana ngenye yalezi iindlela: